

և չհակառակիլ այլ եւս վասն այնր, և ամենայն ազգ բընակեսցի 'ի սահմանեալ տեղիս, ըստ սովորութեան իւրեանց առանց հակառակութեան և խռովութեան: Յորժամ հասանիցէ հրովարտակս առ բարձրագոյն ատեանն ձեր, հաստատեցէք զեպիսկոպոսն զայն և զազգն նորա 'ի Գողգոթայն և 'ի պահարանն, բնակիլ անդ ըստ վաղեմի սովորութեան իւրեանց, և գրեալք 'ի վերայ ազգին Վրաց գիր դատակնքոյ. որպէս գրեցի 'ի հրովարտակիս յայսմիկ, և կատարեալ արդելուլ զնոսա 'ի հակառակութենէ Հայոց: Յանձն առնեմ զնոսա ձեզ եւ զմուսս նոցա 'ի տեղիսն յայնսմիկ. զի արժանի եղեւ մեծ եպիսկոպոսն այն շնորհաց և ողորմութեանս այսմիկ. 'ի դառնալ և 'ի հասանիլ խաղաղութեամբ 'ի տեղի իւր պատուական խիւլայիւս, թէ վասն այսր և թէ վասն այլոյ իրիք. ըստ սովորութեան, որպէս գրեցաք յառաջագոյն, և զոր ինչ միանգամ սահմանեալ եմ 'ի հրովարտակիս: Գրեալ 'ի ՎՋ Րէճէպ ամսոյ՝ Ա♦♦ (1436):

Ընկալաւ կուռականն զբանս թագաւորին, եւ խոնարհեալ հնազանդեցաւ ամենայն հրամանաց նորին, և յանձն առ յանձնել զԳողգոթայն եւ զպահարանն Արքեպիսկոպոսին Մարտիրոսի և ազգի նորա: Ապա ետ կոչել զազգն Վրաց գրել յետկար 'ի վերայ նոցա՝ ըստ բանի հրովարտակին: Եկին և յանդիման եղեն յատենի անդ տեսուչն Վրաց Աթաբեկ որդի Թագայի որդւոյ Զէվոնկի, Զաքարի՝ որդի Գէորգայ որդւոյ Ղապրի: Մխրելու որդի Սատոնի որդւոյ Գեամբի, յազգէ Վրաց. և խոստովան եղեն յատենի անդ հաճութեամբ և հաւանութեամբ իւրեանց. որք էին 'ի կենդանութեան և 'ի խաղաղութեան, և ատեն 'ի սոյն թուականէս սկսեալ այսուհետեւ չունիմք հակառակութիւն վասն Գողգոթային այնմիկ և պահարանաց նորին, ոչ մեք և ոչ ոք յազգէն մերմէ. և չունիմք այսուհետեւ ոչ ընդ եպիսկոպոսին և ոչ ընդ ազգին Հայոց. ոչ վէճ, ոչ կռիւ, ոչ ատելութիւն, ոչ թշնամութիւն, ոչ դատ և ոչ դատաստան: Եւ այսպիսի եղանակաւ կատարելապէս 'ի բաց կացին, օրինօք և դատաստանաւ արդելին զինքեանս 'ի Գողգոթայէ և 'ի պահարանացն, չվիճել և չհակառակիլ յամենայի վասն այնր, որ և իցէ առթիւ: